

**Bosna i Hercegovina
Federacija Bosne i Hercegovine
Zeničko-dobojski kanton
OPĆINA VAREŠ
OPĆINSKO VIJEĆE**



**Broj: 01-299/25
Vareš, 27.11. 2025. godine**

Na osnovu člana 132. Zakona o zaštiti od požara i vatrogastvu („Službene novine Zeničko-dobojskog kantona“, broj: 5/11), člana 13. Zakona o principima lokalne samouprave u Federaciji BiH („Službene novine Federacije BiH“, broj: 49/06 i 51/09) i člana 22. tačka 6. Statuta Općine Vareš-Prečišćeni tekst broj: 162/12 od 11.09. 2012. godine, Općinsko vijeće Vareš na 11. sjednici, održanoj 27.11. 2025. godine, d o n o s i

ODLUKU **o naknadama za vatrogastvo**

Član 1.

Ovom Odlukom utvrđuju se obveznici i visina naknade za vatrogastvo, način prikupljanja, namjena sredstava i rokovi plaćanja.

Član 2.

Obavezu plaćanja naknade imaju privredna društva i druga pravna lica, vlasnici i korisnici proizvodnih, poslovnih i drugih prostora koji nemaju uređen način protivpožarne zaštite, nemaju vlastitu vatrogasnu jedinicu niti su sklopili ugovor s Općinom Vareš za pružanje usluga zaštite od požara i spašavanje ljudi i materijalnih dobara u slučaju požara.

Član 3.

Privredna društva i druga pravna lica koja imaju uređen način protivpožarne zaštite, osnovanu vatrogasnu jedinicu, ili su zaključila ugovor sa Općinom Vareš, nisu u obavezi plaćanja naknade.

Član 4.

Visina naknade iz člana 1. ove Odluke, određuje se prema jedinici površine koju koriste obveznici iz člana 2. ove Odluke, kao i prema požarnom opterećenju i požarnom riziku objekta, i iznosi:

- za poslovne i proizvodne prostore-----0,10 KM/m² mjesečno
- za skladišne prostore-----0,15 KM/m² mjesečno
- za prostore koje koriste zdravstvene, obrazovne i kulturne ustanove i organizacije-----0,01 KM/m² mjesečno.
- za obveznike iz člana 2. stav 1. i 2. koji se bave djelatnošću kao što je: tehnologija proizvodnje zapaljivih materijala, trgovina zapaljivim materijalima, drvoprerađiva, metalurgija, i sl., visina naknade utvrđuje se na temelju površine prostora u kome se obavlja ta djelatnost i iznosi 0,30 KM/m² mjesečno.
- za preduzeća koja se bave prometom nafte i naftnih derivata, prometom i distribucijom plina visina naknade utvrđuje se na temelju zapremine rezervoara za gorivo i broju plinskih boca a ista iznosi 3,00 KM/m³ i 1,00 KM po boci plina mjesečno.

Član 5.

Naknada za vatrogastvo obračunava se tako da se korisna površina prostora izražena u kvadratnim metrima pomnoži s cijenom naknade po kvadratnom metru utvrđenom ovom Odlukom, čime se dobije iznos naknade za jedan mjesec.

Dobiveni mjesečni iznos se zatim pomnoži sa 12 mjeseci, čime se utvrđuje ukupni godišnji iznos naknade za vatrogastvo.

Član 6.

Sredstva iz naknade za vatrogastvo koristit će se za finansiranje različitih aktivnosti i projekata koji podržavaju vatrogasne službe, kao i prevenciju i zaštitu od požara.

Specifična namjena tih sredstava uključuje:

- Održavanje i nabavka vatrogasne opreme: finansira se nabavka vatrogasnih vozila, opreme, odjeće, zaštitnih sredstava, te opreme za gašenje i spašavanje.
- Obuka vatrogasaca: sredstva se koriste za edukaciju i obuku vatrogasaca, kao i za specijalističke obuke za borbu protiv različitih vrsta požara i spašavanje.
- Izgradnja i održavanje vatrogasnih stanica: finansira se gradnja, obnova ili održavanje vatrogasnih stanica i objekata koji su neophodni za rad vatrogasnih službi.
- Tehnička i materijalna pomoć: sredstva se mogu koristiti za nabavku napredne tehnologije i alata za brže i efikasnije gašenje požara.
- Edukacija građana: aktivnosti vezane za podizanje svijesti građana o opasnostima od požara.

Član 7.

Nalogodavac po sredstvima naknade za vatrogastvo je Općinski načelnik, po prijedlogu Službe civilne zaštite Općine Vareš.

Član 8.

Administrativno-stručne poslove koji se odnose na izdavanje rješenja, prikupljanje sredstava od naknade za vatrogastvo, praćenje troškova i namjenske upotrebe navedenih sredstava, vršit će Služba civilne zaštite Općine Vareš.

Član 9.

Računovodstvene i knjigovodstvene poslove naknade za vatrogastvo, vodit će Služba za privredu, finansije i trezor Općine Vareš.

Član 10.

Naknadu iz člana 5. ove Odluke, obveznici su dužni platiti po ispostavljenom Rješenju o određivanju naknade u kojem će biti formulisan način i rokovi plaćanja naknade.

Član 11.

Danom stupanja na snagu ove Odluke prestaje da važi Odluka broj: 01-52/12 od 29.02. 2012. godine.

Član 12.

Odluka stupa na snagu osmog dana od objavljivanja na oglasnoj ploči Općine vareš.



**PREDSEDavajući
OPĆINSKOG VIJEĆA**
[Signature]
Matik Rizvanović

Odluka objavljena na oglasnoj ploči Općine Vareš dana 28.11. 2025. godine



OPĆINSKI NAČELNIK
[Signature]
Zdravko Marošević

